

Jausn - Rap

Neuli hob i denkt jetzt is soweit,
I muas aussì do und i wa bereit
Fia a guatas Jauserl und a guatas Bia,
s Wetter hot passt - aussì ba da Tia.

Geh ins nexte Lokal und setz mi hin
und bestell ma a Jausn ba da Kelnarin.
A bisl dreckig is Madl, dann hob is wos gfrogt -
Dei heart oba schlecht: wos host du do gsogt?

Mit an Pleara hob i bstellt und a zeitl drauf
Kummt die jausn daher und scho steßt´s ma auf:
Auf dem Brettl obn liegt a stumpfas messa
Und a ranzigs Gselchts – und es wiad no bessa:

weil des Bia is woam, da Salod voi Sand,
von an Öl ka Spur. Und das Brot in da Hand:
I kann riachn in Schimmel: A Schnops helfat do.
Kriag a stinkatas Klump– kummt der goa vom Klo?

Jetzt probia i in Wein jo jessas maria
Glasln san hin und er stoppelt ois wia
Und dann schau i auf´d Gäst und nimm erst woa
wia di Gspensta sitzns do - aufstelln tan si d´Hoar

und jetzt hear i a no im Hintagrund
a Musik dei klingt noch jaulende Hund,
wo die Milch wird sauer, wenn mas nua heart,
jetz is boid gnua – eppas hob i pleart

und mei Mogn rebelliert, ganz weiß wird mei Gsicht
zum schwitzn fang i an, i dadruck net die Gschicht
und fost muas i speibn zum nextn Bam -
A letzta Schnoacha – ferti is da Tram.